

MENCAPAI KETINGGIAN DUNIA AKHIRAT

KEWAJIPAN PERANGAI YANG MULIA DALAM KEHIDUPAN MANUSIA

Sesungguhnya sifat-sifat perangai yang tinggi dan mulia itu amatlah perlunya, bukan sahaja kepada diri tunggal tiap-tiap seorang tetapi juga kepada jumlah perhimpunan sesuatu kaum dan bangsa. Kerana akhlak yang mulia itulah asas kejayaan bagi tiap-tiap seorang dan tiap-tiap bangsa dalam tiap-tiap medan perjuangan hidup. Ada pun pada diri satu-satu orang tunggal jika sifat-sifat perangai dan budi perkertinya rendah, lemah, keji dan hina maka orang itu menjadi jatuh dan rendah dan hina pula pada pandangan manusia, walaupun ia kaya dan berpangkat tinggi dengan berbagai-bagai gelarannya dan bermacam-macam bintang kebesarannya. Maka demikianlah juga pada bangsa atau umat, iaitu kumpulan yang terjadi daripada perhimpunan diri satu-satu orang tunggal itu.

TIRU TAULADAN RASULULLAH

OLEH ZA'BA

(II)

Jika laku perangai dan budi pekerti orang-orang dalam suatu umat atau bangsa itu pada umumnya rendah dan lemah seperti tiada kuat keyakinan kepada Allah, tiada kuat beramal dan bekerja, tidak cukup rajinnya dan usaha ikhtiar, tiada amanah, tiada benar pada tutur katanya dan janjinya dan perbuatannya, tiada percaya kepada kebolehan diri sendiri, tiada jimat cermat pada belanja dan harta benda, tiada pandai mencari harta atau menggunakannya, tiada pemurah dan tiada mau memberi-memberi pada jalan kebijakan, tiada berat pada mencari ilmu pengetahuan, tidak mau berbuat baik jika tiada balasan nama dan kebesaran atau balasan pahala dan syurga, tidak ada keinginan hendak maju, tidak endah hendak memadankan diri dan melayakkannya bercampur dalam pergaulan masyarakat yang telah berubah dan sediakala berubah serba serbinya, somborg dan takabbur; zalim

dan anjaya kepada sama-sama makhluk Tuhan, tiada kasihan dan tiada suka menolong-menolong. Tidak ingat akan Allah dan nikmat Allah, dan tidak berat akan suruh larangan yang besar-besar dalam agama pada perkara baik dan jahat, dan dan beratus-ratus sifat yang lain seumpama itu – maka walau apa pun ikhtiar dibuat hendak menyelamatkan bangsa itu atau hendak membaiki keadaan itu, tidaklah juga akan berhasil jaya dengan sempurnanya, baik pada tentang perkara dunia atau perkara akhirat.

Pendeknya sifat-sifat keperangai itulah pertama-pertama perkara yang hendak dibetulkan dan dibaiaki lebih dahulu dengan segala jenis ikhtiar dan jalan yang boleh terfikir dan dengan segala jenis asuhan dan didikan dan latihan: bagi anak-anak ialah latihan ibu bapa dan contoh tauladan di rumah. Latihan guru-guru dan contoh tauladan di sekolah: bagi yang sudah besar, latihan pelajaran yang layak bagi orang sudah besar dan latihan agama yang di sayangkan dengan ujian ilmu dan akal, dan lain-lain latihan lagi yang munasabah. Setelah tegap dan betul tapak yang sangat-sangat mustahak ini baharulah boleh berdiri kukuh di atasnya apa-apa bangunan kebijakan dan kemajuan yang hendak

di bina pada mereka itu. Jika tidak, nescaya jadilah

seperti mendirikan rumah di atas pasir jua.

Maka sebagaimana pada diri satu-satu orang tunggal begitulah juga pada diri satu-satu umat dan bangsa yang terjadi daripada kumpulan diri tiap-tiap seorang tunggal itu. Pada diri seseorang tunggal tiada berguna ilmu pengetahuan dan pelajaran tinggi walau di mana pun pasnya dan walau berapa tinggi pun, tiada berguna kealiman dan kepandaian walau melaut pun pun dalam ilmunya, tiada berguna kekayaan dan wang yang banyak walaupun seluruh alam ini dapat dibelinya, tiada berguna kekuasaan dan pangkat kebesaran walau ia memerintah dunia sekalipun – pendeknya tiadalah apa besarnya dan faedahnya sekalian itu jika tidak ada bersama-sama sifat-sifat akhlak dan keperangai yang mulia.

Orang berakal dan orang yang halus adab kesopanan semua akan memandang dia dengan pandangan kasihan dan ada pula yang memandang dengan pandangan cemek, rendah dan hina. Jika ia tiada jatuh dengan sebenarnya pun tetapi pada pandangan orang yang mulia budi pekerti adalah ia daripada jumlah orang yang jatuh juga, bahkan pada kesudahannya ia akan jatuh juga dengan sebenarnya.

Maka begitulah pula pada diri sesuatu bangsa, jika sekiranya umum bangsa itu jatuh akhlaknya dan sifat-sifat keperangainya yang mulia maka tiada ilmu kepandaian dan kekayaan ekonomi, tiada kebesaran dan kekuasaan, tiada kekuatan senjata dan kegagahan tentera, dan tiada putar belit daripada ahli-ahli diplomatnya, akan dapat menyelamatkan bangsa itu daripada rosak, jatuh dan binasa maka barang sebanyak mana jatuhnya akhlak mereka itu – sebanyak mana berkurangan sifat-sifat perangai yang mulia pada mereka itu – sebanyak itulah pula jatuhnya kedudukan diri mereka di dalam tingkat kemuliaan dan kebahagiaan yang sejati jika habis langsung hilang kesemua akhlaknya yang mulia maka bangsa itu pun akan habis lebur, hapus, dan hilang langsung pula sendirinya; jika separuh-separuh sahaja akhlak mereka yang

jatuh atau rosak maka separuh-separuhlah sahaja pula paluan

kejatuhan dan kebinasaan itu yang akan memukul ke atas

mereka. Demikianlah undang-undang peraturan tabiat alam yang telah ditetapkan Tuhan berkenaan akhlak yang tinggi dan akhlak yang rendah dalam tubuh pergaulan manusia.

Maka benarlah sangat pemandangan jiwa yang telah diucapkan oleh Ahmad Shauqi pujangga ahli syair Arab yang terkemuka dan ulung sekali darjatnya pada zaman kita ini. Katanya:

wa innamaillamim illakholaqo ma baqitu

fan hamu zahabtu akhlaqohum zahabu

ertinya: “bahawa bangsa-bangsa dalam dunia ini hanyalah wujudnya akhlak jua, selagi kekal akhlak mereka itukekallah pula mereka. Tetapi jika mereka itu hilang akhlak nescaya mereka sendiri pun hilang pula bersama-sama.”

Inilah satu daripada pemandangan Shauqi yang tajam dan padat Isinya, membuntatkan suatu kebenaran yang luas dalam undang-undang perjalanan tarikh dunia dengan serangkap syair sahaja.

Beberapa banyak umat yang besar-besaran dan tinggi tamadunnya pada zaman dahulu kala telah jatuh dan hancur lebur dan hapus tamadun itu, hanya yang tinggal bekas-bekasnya sahaja lagi di dalam lipatan kitab-kitab tarikh untuk dibaca-baca jadi bandingan dan peringatan kepada orang-orang kemudian. Kerajaan Babil (Babylon) dan tamadunnya, kerajaan Asyura (Asyiria) dan tamadunnya, kerajaan Mesir di zaman Firaun dan tamadunnya, kerajaan Greek tua dan tamadunnya. Kerajaan Rome dan tamadunnya. Kerajaan China dahulu kala dan tamadunnya, kerajaan Parsi dahulu kala dengan tamadunnya dan raja-raja Kasrinya, dan akhirnya kerajaan khalifah Islam dahulu kala dengan tamadunnya pula -semuanya itu telah jatuh dan lebur dan lenyap.

Apakah sebabnya? Tiada lain melainkan sebab jatuh akhlak orang-orangnya, terutamanya orang-orang tingkat atasnya yang di ikuti pula oleh orang-orang tingkat bawahnya sebagai tauladan.

Di antara orang-orang Arab keadaan rakyat meniru jalan kehidupan raja-raja dan orang-orang atasnya ini hingga telah jadi bidalan (annas ala din malukuhum). Ertinya: orang banyak itu hanya mengikut jalan kehidupan raja-raja mereka sahaja. Yakni orang ramai zaman khalifah-khalifah itu hanyalah mengikut rupa perangai raja-raja dan orang besar-besarnya : jika raja-rajanya baik dan taat akan perintah-perintah agama maka orang ramai itupun baik dan taat pula : jika raja-rajanya berperangai syaitan dan melanggar perintah-perintah agama maka mereka pun turut berperangai syaitan dan melanggar batas-batas agama pula. Maka keadaan perangai syaitan itulah yang membawa kejatuhan dan kebinasaan pada orang-orang segala bangsa dalam apa-apa agama jua.

Di dalam Quran beberapa banyak disebutkan contoh kaum-kaum yang telah hancur dan binasa oleh sebab kejatuhan sifat-sifat perangai mereka, oleh sebab kelakuan mereka jahat dan buruk dan derhaka dan tidak hirau akan Tuhan yang sebenarnya: misalnya seperti kaum Ad, kaum Samud, kaum Bani Israel dan lainnya.

Citra dari hal kehidupan orang-orang Greek dan Rom dahulu kala dari keadaan yang cemerlang dan gemilang pada mula-mulanya beransur-ansur menjadi semakin buruk dan cemar, semakin tamak dan haloba, semakin gilakan pangkat dan kekuasaan, semakin gila bersuka-suka, bercantik-cantik dan bersedap-sedap siang dan malam, semakin habur dan boros, semakin zalim dan anjaya dan sebagainya, sedia ada terlukis dalam kitab-kitab tarikh berpuluhan jili: jika hendak di ceritakan semuanya dengan ringkas sahaja pun nescaya tiada boleh habis-habis hingga berpuluhan kali sambung. Demikian pula khabar-khabar dari hal segala kerajaan lain-lain dan tamadunnya masing-masing yang telah jatuh itu. Demikian juga dari hal kejatuhan kerajaan-kerajaan Islam dan tamadun Islam di timur dan barat semenjak 700 tahun yang lalu, mulai dengan kejatuhan khalifah Bani Umayyah di Syam (hijrah 132) dan kemudian pula kejatuhan

Khalifah Bani Abbas yang menggantikan dia di Baghdad (Hijrah 656), serta tamadunnya yang cemerlang masing-masing itu, dan kemudiannya lagi pecah belah dan kejatuhan kerajaan Islam di Sepanyol pula (Hijrah 898) dan kerajaan Fatimiyah dan Mamluk di Mesir! Semuanya itu telah jatuh dan hancur disebabkan oleh kejatuhan sifat-sifat akhlak dan keperangai yang tinggi pada orang-orangnya terutama raja-rajanya. Demikian pula kejatuhan kerajaan Melayu Hindu di Palembang (Sriwijaya) yang besar dan berkuasa di Laut Timur ini lebih seribu tahun dahulu : Dan kerajaan Jawa Hindu Majapahit yang masyhur besarnya di alam Melayu 600 tahun dahulu, dan kejatuhan kerajaan Melayu Islam Melaka yang terkenal di seluruh timur 500 tahun dahulu, dan kerajaan Islam Moghul yang memerintah India sebelum datang Inggeris ke sana.

Berkenaan dengan kerajaan Islam dahulu kala di negeri Spain (Sepanyol) penulis ini sendiri telah berpeluang melawat ke sana melihat-melihat bekasnya pada penghujung bulan Disember tahun 1948 – telah menghabiskan masa selama tiga minggu di sana dengan singkah berhenti tiga empat hari di tempat-tempat yang masyhur dalam tarikh Islam di Andalus (Spain), iaitu Majrit (Madrid), Tholitholat (Toledo), Qartobah (Cordova), Ishbilah (Sevilla), Ghurnatah (Granada) dan kemudian balik ke Madrid lalu melawat “Escorial” tempat rumah perlatihan besar bagi paderi-paderi Katolik serta mengandungi di dalamnya Pegbau dan raja-raja Sepanyol zaman dahulu dan sebuah tempat kumpulan kitab-kitab (*library*) yang terbesar sekali dalam negeri Spain. Ceritanya lawatan saya ini panjang, mudah-mudahan satu hari kelak dapat juga kesempatan menuliskannya jadi sebahagian daripada sebuah buku “pengalamanku dalam pengembaraan” sendirinya. Di sini memadalah disebut setelah saya melawat sebuah dua sekolah tingginya dan berjumpa dua tiga orang professor-profesor bahasa Arabnya serta di jamu makan oleh sekumpulan kira-kira dua puluh orang murid-murid Arab yang

belajar di sana dari negeri jajahan Spain di utara Afrika dan kemudian melawat Khutubk hanahnya (*librarian*) dan melihat beberapa kitab-kitab lama bahasa Arab tulisan tangan, maka teringat saya dengan sedih dan sayu bahawa pada zaman dahulu penuntut-penuntut daripada bangsa Eropahlah yang datang belajar ke sekolah tinggi Islam di Qurtubah, di Syubyah dan di Ghurnatah hingga ada yang datang dari negeri Paerancis, negeri German dan dari England, tetapi sekarang sudah terbalik iaitu murid-murid bangsa Arab pula datang belajar ke sekolah tinggi Spain! Kemudian apabila saya melawat bekas masjid besar Al-Jamek Al-Umawi di Cordova yang sekarang telah dijadikan gereja besar (Kethedral) oleh orang Spain, saya dapati tulisan-tulisan Arab dan ayat-ayat Quran dan doa-doa dan rangkapan-rangkapan syair dengan bahasa Arab masih ada terukir dan terpahat jadi perhiasan pada tiang-tiang dan tembok-temboknya, tidak dihapuskan oleh orang-orang Spain, sekadarkan disayangkan mereka pula dengan tulisan-tulisan dalam bahasa Latin menuturkan ayat-ayat dari kepercayaan agama Masihi, dan di sana sini pada tiap-tiap curuk ada patung-patung daripada batu marmor putih merupakan Siti Maryam mendukung “anak Allah” di hadap oleh beberapa orang malaikat di kelilingnya ! Maka pada ketika itu insaf dan hina rasa hati mengingatkan perubahan yang telah terjadi itu! Kemudian apabila saya lawati dan lihat pula bekas-bekas Istana Raja Islam di Tolyathlib, dan bekas “Madinah Al-Zahra” di Cordova dan istana lama yang bernama “Al-Qasr” di Sevilla yang di simpan dan di jaga dengan segala kelengkapannya dan taman-taman bunga dikelilingnya dipulihkan sebagaimana asal dahulu, dan istana “Al-Hamra” yang amat indah di Ghurnatah serta kebun bunga “Jannah Al-Arif” nya dengan kolam-kolam dan pancuran-pancuran mata airnya yang masih di jaga dan di bela bersih sebagaimana asalnya 600 tahun dahulu, maka dengan tiada sedar berlindung airmata dan hati saya melayang teringat kepada ayat-ayat quran dalam surah Ad-Dukhan (*kam taraku min jannatin wa'yun** *wazuru'in wanaqamin karim** *wani'matin*

*kanu fiha fakhihin** *kazhalika wa urathnaha qauman akharin**
*famabakat alaihimus samau wal ardhu wa ana kanu munzhorin**
 Ad-Dukhan 25-29). Ertinya : “Banyak telah mereka tinggalkan taman-taman bunga dan pancuran-pancuran mataair yang memancut* dan ladang-ladang gandum dan bangunan mahligai yang hebat-hebat* dan perkakas-perkakas kemewahan dan kesedapan hidup yang di dalamnya mereka telah bersuka-suka dan bercengkerama* demikianlah kesudahannya! Telah kami pusakakan sekaliannya itu kepada suatu kaum yang lain* dan tidaklah mereka itu ditangisi oleh langit dan tiada oleh bumi, dan tidak pula mereka itu diberi tangguh atau tempoh daripada menerima balasannya itu!”

Firman Allah Taala: (*wa tilka aiyamu nudziluhu bainan nasi wal ya'lam allahu lazina amanu wa yattakhiza minkum syuhadaa wallahu la yuhibbu zholimin*: Al-Imran 140). Ertinya : “Dan hari-hari naik turun suatu bangsa demikian itu kami gilir-gilirkan di antara manusia; dan supaya Allah Taala tau siapa orang-orang yang beriman, dan supaya ia ambil kepada dirinya dari antara kamu saksi-saksi yang sedia mau terkorban kerana kebenaran; dan Allah Taala tiada gemar akan orang-orang yang berbuat zalim dan jahat.”

Umat-umat dan kerajaan besar-besar zaman kita sekarang ini pun tetaplah tertakluk di bawah undang-undang keperanganai baik jahat ini juga, tiada boleh terlepas daripadanya. Walau berapa besar pun mereka, berapa pun bijak dan pandainya mereka membelit dan menipu bangsa-bangsa lain yang lemah dengan diplomasinya, walau berapa pun luas ilmu pengetahuan mereka dan siasah selidik mereka akan rahsia-rahsia alam kejadian, berapa pun ajaibnya kepandaian-kepandaian pertukangan yang mereka keluarkan dan senjata-senjata dahsyat daripada segala jenisnya yang mereka reka dan adakan, berapa pun besar dan luasnya perniagaan mereka dankekayaan mereka dan pemerintahan mereka: tetapi selagi berkekalan sifat-sifat akhlak yang buruk memerintahkan hati dan batin mereka tidaklah juga mereka akan dapat terlepas daripada menerima

balasan yang telah ditetapkan Tuhan kerana itu pada akhirnya kelak jika setelah di balakan mereka dengan bermacam-macam seksa dan cubaan kerana hendak mengajar dan mengujinya, maka tidak juga insaf dan sedar dan berubah. Nescaya mereka pun akan hilang dan hhapus sekali pula dari muka bumi ini sebagaimana umat besar-besaran dahulu kala itu telah hilang dan hhapus digantikan oleh umat-umat lain yang lebih layak daripada mereka.

Sekarang bagaimana yang kita lihat dan dengar dan ketahui daripada perkhabaran hari-hari, umat besar-besaran kita yang ada di dunia pada hari ini tidaklah ada apa lain yang di ingat dan di ucap mereka siang dan malam dalam surat-surat khabar, dalam radio, dalam majlis-majlis mesyuarat dan lainnya melainkan perkara-perkara kebesaran, kekuasaan, kekuatan perang, kekayaan, (ekonomi), keuntungan, kerugian, kemegahan, kemasyhuran, kesenangan, jalan-jalan kesedapan dan mendapat kesukaan : Dan mereka bekerja siang malam kerana hendak mendapat dan mengekalkan perkara-perkara itu bagi dirinya dan bagi bangsanya masing-masing dalam dunia ini segala orang besar-besar dan orang-orang masyhur mereka yang telah berjasa kepada bangsa mereka walaupun telah membawa rosak dan kecewa kepada bangsa lain, dibuatkan gambar batu supaya kekal diingat orang konon, pada hal hamba Allah itu tetap sudah mati juga! Maka sekali sekala dibuatkan kalung bunga ke kuburnya “tanda ingat” dan kadang-kadang dipuja pula seperti berhalal! Adapun kepada Allah Taala sekali sehari pun tidak pernah ingat: jarang-jarang benar menyebut Tuhan, dan tidak pernah membangsakan apa-apa perbuatan mereka kepada kudrat Allah atau membangsakan apa-apa nikmat dan kejayaan yang mereka peroleh kepada limpah kurnia Allah. Melainkan semuanya mereka letakkan kepada kudrat dan kuasa mereka sendiri sahaja: mereka yang membuat, mereka yang berkuasa mereka yang mendapat, dan Allah Taala tidak pernah termasuk dalam kiraan itu! Pada hal firman-Nya (*wallahu khalaqokum wama takmalun* : Surah As-Saffat 96). Ertinya : “Allah

taala telah menjadikan kamu dan menjadikan apa-apa yang kamu perbuat dan kerjakan”. Dan (*wama bikum min nikmatin faminallah*: surah an-Nahl 53). Ertinya “dan barang apa-apa nikmat yang ada pada kamu maka semuanya daripada Allah belaka dan (*afabinikmatillahi yajhadun* : An-Nahl 71). Ertinya : “adakah mereka akan menidakkannya nikmat yang telah dikurniakan Allah kepada mereka?”

Wal hasilnya mereka tidak hirau akan Tuhan bahkan kalau boleh mereka kalah seolah-olahnya hendak menjadi Tuhan! Mereka tiada syukur akan nikmat Tuhan, seperti firman Allah Taala di dalam Quran (*wabinikmatillahi hum yakfurun* : An-Nahl 72). Ertinya : “ dan akan nikmat Allah mereka itu tidak menerima kasih sekali”. Pada hal firman Tuhan pula (walain kafartum inna azabi lasyadid : surah Ibrahim 7). Ertinya: dan tentu sekali jika kamu tiada mengenang budi (kepadaku) bahwasanya seksaku amatlah keras”. Maka sebab itulah dari satu ke satu masa mereka itu berulang-ulang di laga-lagakan oleh Tuhan sama sendirinya hingga remuk redam dan pecah berdarah, bengak bengkil dan patah riuk, punah ranah dan rosak binasa! Dan akan berkekalan di laga-lagakan demikian itu selagi mereka tidak mengubah akan hal mereka dan cara pemandangan hidup mereka itu. Balasan demikian ialah menyempurnakan hukuman Tuhan yang berkata di dalam Quran (*weaminal lazina qolu inna nasoro akhazna misaqohum fanasu hazzon mimma zukkiru bihi faaghroina bainahumu adawatawal baghdhoa ila yaumil qiyamah wasaufa yunabbi'uhumullahu bima kanu yasnauun*: Al-Maidah 14). Ertinya: dan daripada orang-orang yang berkata bahwasanya kami orang Kristian, kami telah mengambil perjanjian mereka: tetapi mereka telah melupakan sebahagian yang baik daripada ajaran yang telah diperingatkan kepada mereka. Sebab itu telah kami masukkan ke dalam antara mereka itu perasaan bermusuh-musuhan dan berbenci-bencian hingga hari kiamat kelak. Kemudian Allah Taala akan menghabarkan kepada mereka itu dari hal apa yang mereka selalu telah buat”.

Pada hari ini setiap-setiap saat dan ketika mereka sentiasa membuat perkiraan dan mengatur pelan hendak mengelak atau menghindarkan hukuman Allah itu: Sekejap-sekejap terbang ke sana, sekejap-sekejap mesyuarat di sini dan sebagainya. Tetapi firman Tuhan dalam Quran (*wamaqaru wamaqarullah wallahu khairul makirin* : Surah Al-Imran 54). Ertinya:

“Mereka mengatur-mengatur pelan dan Allah Taala pun mengatur pelan, tetapi Allah Taala itulah yang terlebih pandai sekali mengatur di antara pengatur-pengatur pelan sekaliannya,” oleh itu kerap kali kita lihat bahawa pelan-pelan yang mereka atur itu jugalah akhirnya yang selalu membawa terjadinya perkara yang mereka hendak elakkan itu!

(sambungan daripada muka 14)

Ibadat sembahyang itu nescaya kepadanya dikurniakan Allah sifat-sifat orang muslim sebagai yang tersebut dalam Quran surah Al-Furqan ayat 62 hingga 77. Saya salinkan dalam bahasa Melayu: “hamba Allah yang soleh, ialah yang berjalan di bumi Allah dengan tenang – tidak sompong- jika berselisih dengan orang-orang jahat, dia menjawab “selamat” mereka itu pada tiap-tiap malam berdiri dan sujud akan Tuhan. Mereka itu berdoa kepada Allah, Ya Allah! Lepaskanlah kami daripada azab neraka. Sesungguhnya azab neraka itu sangatlah dahsyatnya. Sesungguhnya dalam neraka itu sejaht-jahat tempat tinggal mereka itu orang-orang Islam. Jika mereka berbelanja tidaklah berlebih-lebihan, tetapi tidaklah mereka bakhil. Berbelanjalah mereka itu dengan sederhana atau pertengahan. Orang-orang Islam itu tidak memohonkan pertolongan hanyalah kepada Allah. Tidak mereka bunuh membunuh kecuali dalam sabillah. Tidak mereka berbuat zina kerana orang-orang yang berzina itu akan menerima hukuman yang dahsyat di perlipat gandakan hukuman itu pada hari akhirat bahkan kekal dalam tempat yang hina melainkan mereka yang taubat akan kesalahannya dan berbuat berbagai-bagai kebaikan. Mereka itulah orang yang diganti Allah kejahatannya dengan

Akan kita sekarang inilah pula contoh tauladan yang hendak kita tiru, bukan contoh tauladan yang telah ditunjukkan oleh Rasulullah pada ketinggian sifat-sifat perangai dan akhlak. Adakah akan boleh membawa selamat pada akhirnya kelak? Masyallah! Jepun telah menirunya, maka Jepun telah menerima pukulan kejatuhan daripada tirulannya itu! China telah menirunya, maka China pun telah mendapat dan tengah lagi menanggung hukuman itu pula – sentiasa di dalam permusuhan dan benci-bencian sama sendiri! Banyak lagi orang lain yang telah meniru dan tengah menirunya, dan mereka pun tiada syak tentu akan sampai ke pintu itu juga jika mereka tidak mementingkan sifat-sifat makram akhlak yang kita bicarakan ini.

kebijakan. Bahwasanya Allah itu sangat pengampun dan sangat pengasih. Barang siapa berbuat amal soleh maka sesungguhnya Allah akan mengurniakan taubat kepadanya dan menerima taubatnya. Orang-orang Islam itu nanti tidak mahu menjadi saksi yang palsu. Apabila mereka itu berjalan melalui orang-orang yang berbuat maksiat, mereka lewat sahaja dengan baik-baik. Apabila dibacakan nama Allah kepada mereka itu didengarkannya baik-baik, tidaklah mereka pura-pura pekak atau buta, mereka itu berseru-serukan Tuhan. Kurniakanlah akan isteri-isteri kami, dan anak buah kami ikutan orang-orang yang taqwah. Mereka itulah yang beroleh rahmat kurnia Allah syurga, oleh kerana mereka itu sabar, sabar dalam berbuat taat dan sabar daripada berbuat dosa. Kekallah ia dalam kesenangan abadi. Katakanlah kepada mereka yang kafir itu, Allah tidak akan menghiraukan mereka itu, walaupun mereka tidak menyembah Allah. Sungguh mereka itu membohongkan agama Allah sebab itu mereka akan di seksanya nanti.

Sidang pembaca yang dihormati, moga-moga Allah mengurniakan taufik dan hidayah bagi kita semua di dunia berbahagia dan di akhirat mendapat nikmat kekal abadi. Amin ya rabbal alamin.